

Daphne Every:

Ubicacion tabata un aspecto hopi importante pe renobacion di Willem de Zwijger Plein



ORANJESTAD – Ubicacion tabata un aspecto hopi importante pa renobacion di Willem de Zwijger Plein.

Esey ta pa loke ta trata e infraestructura y e aspecto simbolico di e plaza, mirando cu e ta situa dilanti di e edificio recien renoba di Corte di husticia.

Pa tal motibo inspiracion di su diseño a bin a base di e tres elementonan cu ta representa Husticia, esta e lenso, e balansa y e Spada.

Daphne Every ta miembro di e ekipo di Monumentenbureau y e diseño di renobacion di Willem de Zwijger Plein, popularmente conoci como Plaza Alameda, ta den su man. El a splica cua ta e factornan cu un papel importante ora cu a dicidi kico ta wordo restaura y kico ta bay introduci na e espacio publico aki cu ta bou construcion y ta keda cla pa mita di aña.

Every a splica consecuentemente cu como cu ya tabatin un obelisk riba e Willem

de Zwijger plein, a tuma esey pa representa e Spada, pero tambe e parti memey di e balansa. Loke ta e lenso, esey ta bin incorpora den e vloer dor di un cambio di e color di mosaico. Ta bay pone mosaico blanco di piedra di coral pa ilustra e paña ey.

Otro elemento cu ta representa husticia na nivel mundial ta e 'Lady Justice' of Dama Husticia y esey ta un estatua cu Monumentenbureau a encarga e artista Arubiano Ciro Abath pa traha. Pa duna e toke Arubiano, e base riba cual e ta para, tambe lo ta traha cu piedra di coral.

Pa loke ta trata e restauracion di e plasa, Monumentenbureau naturalmente no por a laga esaki a tras. Daphne Every a indica cu "Durante añanan e plasa a wordo cambia y elementonan cu tabatin originalmente no a keda cu excepcion di e obelisk. E plasa original tabata parti den cuater cuadrant, delinea dor di pilonetjes cu tabata parce



Arubaantjes." Nan ta bay trece e estructura ey bek dor di pone luznan cu ta briya bay ariba y ta crea e efecto di e spirito di un pilon chikito. Na mesun momento, di e manera aki ta ilumina henter e plaza."

Esaki no ta e unico fuentenan di luz. E diseño di e plasa ta conta cu iluminacion den e bankinan pa sinta, mescos cu den e bakinan pa e matanan cu t'ey y cu ta bay wordo planta. Na diferencia di loke tradicionalmente ta uza na plasanan, como por ehempel, lanterna; aki a scoge pe iluminacion tin un dobel funcion y brinda tambe un ambiente sigur y agradabel.

E trabounan riba Willem de Zwijger plein a cuminsa na



januari y tur cos ta canando bon. Pesey mes ta spera cu e proyecto lo keda cla na tempo y den presupuesto na luna di juni proximo. E ta forma parti di e vision y plan

di Gabinete Mike Eman I y II pa renobacion di centro di ciudad. Tambe ta brinda na sociedad Arubiano otro espacio publico cu por disfruta di dje. □